



U BiH i Srbiji uhapšeno 14 osoba zbog ratnog zločina

Iz voza oteli i ubili 20 ljudi

VOZ SAOBRAĆAO NA RELACIJI BEOGRAD - BAR

Žrtve: Ubijeni državljani Srbije i Crne Gore bošnjačke nacionalnosti, jedna osoba hrvatske nacionalnosti i jedna osoba afro-azijskog porijekla

Mirsada LINGO-DEMIROVIĆ

SARAJEVO - U BiH i Srbiji u petak u ranim jutarnjim satima, po nalogu Tužilaštva BiH i Tužilaštva za ratne zločine Srbije, uhapšeno je 14 osoba zbog sumnje da su počinile ratni zločin, i to deset u BiH, a četiri u Srbiji.

Postupajući po naredbi Tužilaštva BiH, policijski službenici Državne agencije za istrage i zaštitu (SIPA) u koordiniranoj akciji s pripadnicima MUP-a Srbije uhapsili su na području Višegrada i Prijedora deset oso-

ba zbog ratnog zločina. Navedene aktivnosti realizirane su u saradnji s pripadnicima MUP-a RS.

U BiH su uhapšeni Luka Dragičević (63), Boban Indić (42), Obrad Poluga (43), Oliver Kršmanović (53), Petko Indić (54), Radojica Ristić (45), Momir Nikolić (52), Vuk Ratković (64), Dragan Lakić (54) i Novak Poluga (51) zbog postojanja osnovna sumnje da su počinili krivično djelo ratni zločin protiv civilnog stanovništva, na području Višegrada tokom 1993. godine.

Srbijanskim medijima je iz

Tužilaštva Srbije potvrđeno da je među uhapšenima i komandant interventne višegradske brigade Boban Indić, te brat haškog osuđenika Milana Lukića, Gojko Lukić, kao i komandant višegradske brigade Luka Dragičević. Osobe koje su lišene slobode osumnjene su za ratni zločin u Štrpcima i Višegradu, kada je iz voza na relaciji Beograd - Bar oteto i kasnije na području BiH ubijeno najmanje 20 žrtava, državljana Srbije i Crne Gore bošnjačke nacionalnosti,

jedna osoba hrvatske nacionalnosti i jedna osoba afro-azijskog porijekla.

Oba tužilaštva u ovom predmetu formirala su zajednički istražni tim, koji je oko godinu dana, intenzivno, na području BiH i Srbije, u saradnji s policijskim agencijama iz dvije države, prikupljao dokaze o počiniocima ovog stravičnog zločina, koji je bio nerasvjetljen 19 godina.

Detaljnim i temeljitom istragom prikupljeni su dokazi o počiniocima ovog zločina, a tužici iz Sarajeva i Beograda, ko-

ji vode predmet, u stalnom su kontaktu od početka akcije hapšenja. Među osumnjičenima ima visokorangiranih vojnih dužnosnika Vojske RS iz tog perioda, kao i izravnih izvršilaca koji su sudjelovali u surovim mučenjima i kasnijim egzekucijama žrtava koje su nakon ubistva bačene u rijeku Drinu.

Goran Salihović, glavni tužilac u BiH, naglasio je u petak značaj jačanja regionalne saradnje, te dodao da je sastanak tužilaca BiH i Srbije održan u četvrtak na Paliću, gdje je i dogovorena ova akcija.

Za otmicu i ubistvo putnika u Štrpcima zasad je odgovarao jedino Nebojša Ranisavljević iz Despotovca, koji je 9. septembra 2002. godine presudom Višeg suda u Bijelom Polju, osuđen na 20 godina zatvora. Bio je pripadnik voda "Osvetnici" u sastavu interventne čete kojom je komandovao Indić.

Kako je sud u Bijelom Polju utvrdio, putnici su izvedeni iz voza, odvedeni u školu u Prelovu, u višegradskoj opštini, gdje su opljačkani i pretučeni, a zatim odvedeni do napuštene kuće blizu Drine i ubijeni.



PRIVEDENI

Među uhapšenima i komandant interventne višegradske brigade Boban Indić, te brat haškog osuđenika Milana Lukića, Gojko Lukić